



Universitätsbibliothek Paderborn

**R. P. F. Ioannis Nider Ordinis Prædicatorum Theologi De
Reformatione Religiosorvm Libri Tres**

Nider, Johannes

Antverpiæ, 1611

R. P. F. Ioannis Bovcqvætii Dominicanii Antuerpiensis Ad Religiosos
Præfatio.

[urn:nbn:de:hbz:466:1-45728](#)

R.P.F. IOANNIS BOVCQVETII

Dominicani Antuerpiensis

A D

RELIGIOSOS

P RÆFAT I O.



A EST natura rerum humana-
narum, Religiose lector, vt
nullius umquam boni tanta
fuerit felicitas, quin felicita-
tis summæ prætextus, mali
quidquam conaretur irrepere. Nihil autem
fide præclarior, cuius tamen obtextu erum-
pere conatur perfidia: quam qui sectantur,
merito obscuri & infelices habentur; cum
titulo dumtaxat sint Christiani, dum in-
tus perfidiam spirant. Idem laudatissimæ
Religiosorum professioni obtingere vide-
mus, quam ad summam morum integritatem,
vitæque candorem constat institutam esse;
in qua vehemens pietatis ardor flagrare
solet, cum cultus vili, victus tenui contenti,
omni-

omnibus rebus terrenis spretis, omne tem-
pus dicabant aut sacris hymnis, aut sanctæ
lectioni, aut cœlestibus colloquiis, aut piis
precibus, aut charitatis officiis, quibus
ægroti aut hospites refocillabantur, aut e-
gentes subleuabantur. Nec aliud Religiosi,
quam grex vltro confirans in purissimos
Christi mores atque doctrinam. In hanc
præclaram vitæ rationem videtur velle ir-
repere quedam vitæ corruptio & languor
pietatis: quod dum grauiter perpendo, vi-
deo periclitari dotes illas præclaras, & ra-
ra ornamenta quæ hoc præclarum & san-
ctum vitæ genus Deo & hominibus com-
mendabant; & instituta sanctorum Pa-
trum, qui varias vitæ sanctissimæ for-
mas suis præscripsere, non nihil labefactari.
cui malo ni tempestiuè ij quorum inter-
est occurrant, in maximum discrimen de-
ueniet quidquid est Religionis, quidquid
bonarum legum, quidquid monasticae disci-
plinae, quidquid probatorum morum, quid-
quid honestorum studiorum; & fieri sicut oīce 4.
populus, sic & sacerdos. Audeo itaque,
quod

P R A E F A T I O

quod in maris tempestatibus quiuis audet.
Scio prudentes Præfectos Religiosorum
meis monitis non egere: non aspernabuntur
tamen, cùm nullum fretum adeò tranquil-
lum, quod non quandoq; suos patiatur mo-
tus; in quibus quantumuis periti guberna-
tores, se à quouis moneri patiuntur. Iungo
peritissimo Religionis Præfecto IOANNI
NIDERO, qualemcumque exhortationem:
qui dum quodam in loco tempestates sœuire
vidisset, prudenter admodum de REFOR-
MATIONE RELIGIOSORVM libros
conscriptis, quibus docet sœuentes tempe-
states, ventos & vndas euadere, modum-
que designat quo monasticam nauim tuta in
statione reponas, vel tempestatibus quassam
& attritam pristinæ integritati restituas,
ut ea veri Christiani iuuentur, & in cæle-
stem Jerusalem inuehantur, omni bonorum
aggregatione repleti. Ad hoc quantum hic
status conferat, ex admirabundo Vate Eu-
angelico habes, dum rogat: Qui sunt isti
qui vt nubes volant, & quasi columbae
ad fenestras suas? quo duplex vitæ reli-
gioſæ

Isa. 60.

A D R E L I G I O S O S .

gioſæ genus eleganter describit : alterum
nubibus , alterum columbis æquiparatum.
Nubes ſolis ardore à terra deduētæ & in
ſublime elatæ terram rigant , atque fœcun-
dant. Vides in orbe Christiano hominum ge-
nus quod ſoliuſ iuſtitiae amore atque ardore
ſupra cunctos mortales ut nubes eminet ,
& cæleſtis pluuiia verbi atque exempli ter-
ram ſubiectam fertilem reddit. Haec nubes
Religioſi , qui altiores ſunt quam ut terræ
conglutinetur, aut rebus terrenis inhæreant.

Tria in terra geruntur quibus hominum
mentes ceu glutino quodam terrenis adhae-
rent: coaceruare opes, libertate frui, & af-
fluere voluptate; At Religioſi iij quibus
nihil hifce cum rebus eſt familiare, ſed qui-
bus mundus crucifixus eſt ; omnia quæ
mundus ſectatur, quadam Paulina gene-
roſitate arbitrantur ut ſtercora, ut lucrifia-
ciant Christum : non libertati ſed obedien-
tiæ legibus , non opulentia ſed paupertati
Euangelicæ, non voluptati ſed puriſimæ ca-
ſitati omnino deuoti. Utinam atque utinam
diſcant Religioſi perpendiculo & linea vti,

* * ſuique

P R A E F A T I O

suique status nobilitatem metiri; quam ignavi et inertes quidam in terram abiiciunt.
Discant quam sit ignobile, caput supra nubes extollere, & cor in huius mundi fecibus volutare: quod faciunt qui non moribus, sed pallio dumtaxat religiosi sunt, eaq; praeuaricantur quæ mentem ornant atque illustrem reddunt. Id cum primis obedientia præstat, necessarium Religiosi decus: hæc, propria voluntate exuta, facit ut tua voluntas Christi fiat, aut sane eius qui non minus quam ipse Christus est audiendus, dum inquit: Qui vos audit, me audit. adeò quod cernere liceat Religiosos, absque sua voluntate non suos sed Christi, & cum voluntate Christi ipsos quasi Christos, ad instar Pauli dicentis: Viuo ego, iam non ego, sed viuit in me Christus. quo consequuntur nomen quod est supra omne nomen; quod obedientiæ legibus subiectis, cum Christo Iesu Propheta addicit, dum ait terram, quæ nuncupatur Voluntas mea in ea, futuram coronam gloriæ in manu Domini, & diadema regni in manu Dei.

Hunc

Luc. 10.

Galat. 2.

Isa. 62.

AD RELIGIOSOS.

Hunc summum ambis honorem, Religiose
lector, hic tibi splendor placet? in tua terra,
terreno corpore dico, inhabitet Dei eiusque
vices gerentis voluntas; nihil ex tuo arbitrio,
ne minima quidem agas; te ad eorum
nutum & iussum totū componas: vel dor-
mire, expergisci, redormiscere, loqui, tacere,
ire, redire, cibum capere, desinere pastu, ex
ipsorum præscripto fiat, & nobilis Domini
Dei tui corona eris.

Alij opum affluentia sibi magni videntur:
ego è diuerso hanc homines miseros, sed Eu-
angelicam paupertatem felices & celsos fa-
cere demonstro. Nemo nescit optimè Apo-
stolum dixisse, omnium malorum radi-
cem cupiditatem esse, quæ est & magistra
atque ministra totius improbitatis, quæ ho-
mines calamitosos & obscuros facit: hinc
sceleratus amor habendi nascitur, hinc iniu-
riæ oriuntur, hinc factiones pullulant, hinc
furta, hinc sacrilegia, hinc rapinæ, hinc la-
trocinia proficiscuntur: hæc incestus parit,
adulteria gignit, stupra nutrit, amores insa-
nos & luxus alit. Harum congestio diros

** 2 labores,

P R A E F A T I O

labores, custodia anxios metus, amissio miseros afficit cruciatus. Aliud prorsus Domini
Matth. 19. consilium : Si vis perfectus esse, vade, &
vēde omnia quæ habes, & da pauperibus.
Agit quod homines fortunatos facit,
& mirificè beat, dum ab his malis hominem
immunē seruat, & ad perfectionis gradum
deducit. Inaurentur mundani, & suo auro
in fastigium euehantur. Dei consilio, Deo-
que agente voluntariae paupertati dicatis
Vates promittit: Sustollam te super alti-
tudines terræ. Te eueham & extollam cui
cuncta terrena vident & sordent, qui in id
totus incubis ut thesaurizes thesauros in
cælis, pietatis opibus locuples fias; quibus
nihil ditiis, ut nihil pauperius quam vir-
tutibus egere, & pecuniis abundare. Hac
altitudine status mirum in modum delecta-
ti proceres Ecclesiæ sanctæ: & quotquot
tempore nascentis Ecclesiæ Christo nomen
dederunt, reliquerunt domos & agros, &
omnia quæ possidebant communibus usibus
tribuebant, ut hac sublimitate gauderent,
& potiretur Christi pollicitatione, quæ cen-
tu plu m

Isa. 53.

AD RELIGIOSOS.

tuplum in hoc seculo, & post illud vitam
æternam vovet & dicat iis qui sese Euang-
elicæ paupertati voverunt. Nihil itaque
tibi possessionum aut diuitiarum tuarum
decerpas, ne teruncium quidem, quin &
omnem habendi affectum deponas: tunc
tandem te senties felicem, nihilque habentem
omnia possidentem; centuplum promissum
ore diuino, abundè fateberis tibi collatum.
At secùs continget si mundum corpore fu-
gere videris, animo in monasterium defers
opes Aegypti, census, pecunias, vel quid
eiusmodi. eueniet enim quod Ifraëlitis ad
terram laete & melle manantem properan-
tibus; quibus dum Ægypti farina fuit, non
gustarunt panem cœlestem omnibus eduliis
suaviorem, cunctisque opibus præferendum.
Non gustabis cœlestia, non suavia illa dimi-
na, quibus hominum mentes reficit Deus,
nisi repudies res cœmbratiles quas colit
mundus. quin nisi ab iis reuoces mentem,
paupertatem professus, te dira & dura illa
manent, quæ Ananiam & Saphiram in-
uaserunt; qui paupertatem voluntariam

** 3

men-

P R A E F A T I O

mentientes, perierunt morte repentina et calamitosa. Ab his malis immunis si esse cupis, id serio meditare, ut animus omnibus huic mundi cupiditatibus defacatus, quotidie expeditus ac liber ad Deum euolet, eo fruatur et delectetur; in eo enim totius felicitatis summam reperiet.

Sap. 4. Neq; hic sistit tua dignitas et felicitas, Religiose, quae tanta est, ut eam quasi admirabundus collaudet in Sapiente Spiritus sanctus, dicens: O quam pulchra est casta generatio cum claritate. quo eodem spiritu B. Paulus afflatus, virginem castitati dicatam, longe coniugio iunctam prædicat beatorem; utpote quae casti amoris facula succensa, non mortalem sed immortalem sponsum ardet, et in eo omnes casti pectoris affectus defixos habet. His quantum affiliatur, manifestum reddit, dum Virgo ex Virgine natus, sacro Ioannis virginis contubernio et familiariori vsu delectatus, virginibus in monte Sion peramanter associatus, his nimirum, qui cum mulieribus non sunt coinquinati, sed virgines perman-

Apoc. 14.

AD RELIGIOSOS.

manserunt: quos adeò in delitiis habet,
vt eos Ioannes indiget, non (vt sectarum
magistri) quisquilias, sed Agni primitias;
quasi diuinorum fructuum primitias, quæ
cunctis aliis longè sunt gratiore. At forte
legitimam Venerem amas, vxorem cogitas,
hocque beatum putas; non equidem damno:
memini qui dixerit; Melius est nubere ^{1. Cor. 7.}

quam viri. Pateat istud infirmis asylum.

Non inuideo Segor urbem, ex Sodomorum
incendio fugienti: sed hoc nomine longè vir-
ginibus inferior es, qui non uxorem, non
licitam Venerem refugium habent, quæ li-
bidinem acuit magis; sed, cum Paulo, qui sui
nos similes optat, ad carnis macerationem
& castigationem recurrent, qua se se contra
libidinis flamas muniuit, qui ait: Casti- ^{Ibid. 9.}

go corpus meum, & in seruitutem re-
digo. Ad quod asylum si configissent casti-
tatem professi, numquam ad hæreticorum
castra profugissent impudica carnis manci-
pia, nimio libidinis æstu flagrantia; nec sibi
damnationem acquireret, vt illæ apud san-
ctum Apostolum viduæ, quæ primam fi- ^{1. Tim. 5.}

P R A E F A T I O

dem irritam fecerunt : *qua fide sese ob-*
strinxerūt, qui castitatis votum emiserunt.
Nec est quòd sibi blandiantur Apostoli ver-
bis ; Melius est nubere quàm vri : *qui-*
bis student sacrilegam suam prostitutionem
purgare, quasi ignorent hanc licentiam tan-
tùm fieri iis qui ad nuptias sibimetipsis ad-
itum contrario voto aut sponsione non oc-
cluserunt : alioquin frustrà damnationem
minitaretur viduis sacer Apostolus, qua
dum vri se sentirent ad nuptias, cum fidei-
fragis religionum apostatis confugerunt. Et
si quæ vos libidinis flamma urit, omne vo-
ti castitatis vinculum exurit; cur existima-
tis, dum nescio quo cæco amore fidem dedi-
stis mulierculæ fortè seni, turpi, sordidæ,
malitiosæ, cuius pertæsi, tandem oculis aper-
tis nympham speciosam, quæ tota nitet, cui
decora cæsaries, purpureum iuuentæ lumen,
quæ lætos oculis afflat amores, conspicitis;
cur inquā existimatis istiusmodi flammarum
exurere fidem datam Deo, non autem fidem
mulierculæ delatam ? Fortè dicitis, illam
turpem asylum esse. At libido pulchrioris
puellæ

AD RELIGIOSOS.

puellæ exurit. O miseros , & impudenterissimos , quibus libido soluit & violat fidem datam Deo , non item mulieri ! O perniciosa libidinis pestem , quæ omnem pietatem violat & depopulatur , si eam à suo non arcet pectore castitatem professus . Si mentem oppugnat , eius feruori , Dei amorem , preces flagrantes , acerbam carnis macerationem cum D. Paulo & D. Hieronymo opponas ; ne inescatus ab illa , conciteris ad nullum non scelus audendum , dum animi cæcitatem inducit , quæ tandem in supremi Numinis contemptū degenerat , & quasi catena homines ad æternos cruciatus trahit ; ubi flammæ ultrices tuæ libidinis flamas exurent . Omitto quæ leuiora sunt ; exuit honores , infamiam induit : conficit opes nimio partas labore , efficit pauperem , aufert corporis mentisque salutem , infert sordidos morbos . O acerbam dulcedinem , quæ tot vallata miseriis ! quam momentaneam , tot atrocia cœsequuntur in æternum duratura ! Qui his voluptatibus indulgent , nihil præclarum habent : quin nihil his tetrius , nihil

** 5 spur-

PRAEFATIO

ſpurcius, nihil pecudi vicinus; nulla enim
re ad brutorum conditionem proprius acce-
dunt homines, quam hac fœda carnis libidi-
ne, qua etiam homines pecudibus infeli-
ciores efficiuntur. Illæ enim gratis suis qua-
libuscumque voluptatibus potiuntur. At
hominibus (Deus bone!) quanti constat bre-
uiſſimo tempore carnis libidini deseruiuif-
ſe! dum quantum in deliciis fuisti, tantum
tibi dabitur tormentum & luctus: cum
pars tibi cedet non cum puris & castis illis
in monte Sion, in confortio Agni; sed cum
impuris illis mentibus in stagno & igne &
ſulphure flagrante, ut minatur Apostolus,
& Euangelista prophetico ſpiritu vatici-
natur. Vah carnis ſpurciciem, & fœdam
libidinem, que tot tantisque priuat bonis,
tot tantisque onerat malis! Desinet ſuis cu-
piditatibus ancillari, & libidinibus inhæ-
rere, qui à doméstico hōste palmam trium-
phi cupiditate referre, & virginum præclaras au-
reola decorari; qua nihil ſublimius, nihil
celsius, maximè ſi ei ſacratam obedientiam,
& Euangelicam iuxteris paupertatē. Nihil

in

AD RELIGIOSOS.

in hoc sublunari mundo illustre, clarum &
diues, quod non his virtutibus ornatus, Reli-
giose, vincis, & post te longissime relin-
quis: adeò quòd si eius felicitatem, honores,
opes, voluptates elevo, & vestra cum felici-
tate compono; crede, etiam si Regum essent
splendores, Cræsi diuinitæ, Salomonis delitiæ
vestris comparatæ, & proprius admotæ,
vestræ eluescunt magis, seseque pulchriùs
ostentant: neque, si hec coniungo, aliud ago
quam pictores agunt, qui umbras suis ta-
bulis addunt.

Videtis (ni fallor) Religiosi, meritò vos
ob status altitudinem & claritatem nubi-
bus equiparari. Agite igitur quæ digna am-
plitudine status, & vocationis in quam
estis vocati: quod obedientiæ placitum ha-
bete, & quouis suffragio sanctius indicate.
Amplectimini quæ vos supra altitudinem
terræ eleuat Euangelicam paupertatem. An-
gelorum puritatem ardete, qui neque nubent
neque nubentur. Omnia præclara & magna
vobis addicit Christus, Vates, & Aposto-
lici viri.

Eant

P R A E F A T I O

Eant nunc qui has nobiles virtutes se-
stantes conuitus et) sannis insectari num-
quam quiescunt, & nescio qua cæca inui-
dia extinguere moluntur, et) suum refor-
matum (vt aiunt) vitæ modum Religioso an-
teponunt. sed quam ritè, audite. Religiosi
Dei & Superioris sunt voluntati subiecti;
at Lutheri aut Calvini pulli se onagros libe-
ros & effrenes putant, quibus quod lubet
licet. Religiosi nihil cum carnis libidine &
voluptate commune habent; at quinti Eu-
angelij fratres, Nouatores dico, Epicuri de gre-
ge porci, iis quæ ventris et) sensus sunt om-
nino immersi. quod mouit Apostolum, sectas
operibus carnis annumerare; quia ad carnis
cupiditatem sectandam homines inducunt,
vt vita religiosa ab ea longissimè abducit,
cum ne quidem matrimonij usum suis per-
mittit. Religiosi Christi consilium de rebus
terrenis abdicandis capessunt, nec animum
quidem quid possidei priuatim reseruant,
sed propria despiciunt, et) aliorum usibus
deferunt: sed hi laudatissimi Euangelici,
aliena, non propriis contenti, aspiciunt,
suisque

AD RELIGIOSOS.

suisque v̄sibus rapiunt; pr̄dam faciunt de bonis alienis, violent testamēta, voluntates mortuorum, iura viuorum, & bonos per summū nefās suis exturbant bonis, (ò insignem Euangelicorum perfectionem!) quod quām impudēter, quām palām, quām acerbè agunt, illi omnis iuris tā diuini quām humani violatores, nemo non meridiana luce clariū videt, qui illorum ditiones est vñquā ingressus. Hos sacrosanctos iusti æquiq; cultores, rerum alienarum amatores, quo titulo donabimus haud equidem scirem, nisi summi Imperatores Constantinus Magnus & Justinianus L. fubemus, cap. De sacrosanctis ecclesiis, L. Prætor, §. Ne quid, ff. de vi, & vi armata, lege Iulia publicorum iudiciorum plectēdum, L. Nec interest ff. ad legem Julianam de vi priuata, hos suis titulis ornarent; qui quām illustres, illi viderint.

Nolo pluribus hanc scabiem fricare. Id vnum dico, hæreticis inuitis Religiosam professionem incolunem florere, & ob altitudinem status concinwē nubibus conferri. Neque vñica est eius causa, quod nimirum

vt

P R A E F A T I O

vt nubes , ceteris sint sublimiores , celoq[ue] viciniores ; verum & ideò nubes vocitantur , quod terram subiectam rigent , irrigando reddant fœcundam cœlestis pluvia verbi , & pietatis exemplis mentes hominum humiles ac steriles imbuant , vt euulsis vepribus vitiorum producant fructus Deo dignos . per hos enim S. Ecclesiæ terra aut fertilis est aut sterilis ; cui utinam cum Joële meritò gratulari liceret : Noli timere terra , exulta , lætare , &c. ac mox : Filij Sion exultate & lætamini in Domino Deo vestro , quia dedit vobis doctorem iustitiae , & descendere faciet ad vos imbre matutinum ac serotinum , & implebuntur areæ frumento , & redundabunt torcularia vino & oleo . Hoc ei licet congratulari , quia Ecclesiæ tellurem vix malignam minutamq[ue] frugem videmus producere , cum suis nubibus , Religiosis dico , est destituta . Quæris cur Sarraceni in terra Orientali pullularunt ? Eo loco periére nubes Ordinum sanctorum institutores , aut veterum probi obseruatores . Græciam à

Tur-

AD RELIGIOSOS.

Turcis occupatam miraris? Desine mirari,
quia nubes cælestem rorem stillantes (Reli-
giosos volo) discusserunt. Cupis quid Hun-
gariam, Mysiam, Daciam, Pannoniam
Gottis, Hunnis, Gepidis, Avaribus, Bul-
garis, Slavis replerit? Siccitas nimia, ex
nubium inopia nata. Doles in nostro Belgico
agro, et finitimis terminis oriri tot sectas
dissidentias? Expulsi sunt Ordines Religioso-
rum, aut interiere, qui ut nubes olim hoc
in agro segetes lætissimas fidei et pietatis
sua fœcunditate prouenire fecerunt. Huius
rei fidem facit Munsterus à nobis alienus,
qui in insula amplissima Grotulandia nar-
rat impiam idolatriam reuirescere, exsic-
cari Dei cultum: causam Zinus in libello
suæ nauigationis significat, dum Domini-
canos, qui ut nubes hanc terram rigabant,
inde à Protestantibus dicit exactos. Hic
nubium defectus, sterilitatis grauissima
causa: hinc rara antiqua fides, hinc luxu-
riant maligni mores, casti purique minutus
habentur; omniaq; pietatis studia quadam
ariditate perire videmus. Secus se omnia
habent,

P R A E F A T I O

habent, dum hæ nubes Religiosorum Or-
dinum Ecclesiam tegunt: tum quamdam
bonorum copiam veluti cornu pleno cælitus
in Ecclesiæ agrum dices dimissam, dum
segetes totius Christianæ pietatis lœtissimæ
proueniunt, quibus nec lolium, nec spinam
ullam aut carduum improbitatis videas
internasci: dum florent aurea mala fidei
flore, & fructu charitatis, fici misericordiæ
pinguissimæ, & frugum virtutū omniuaga
genera, quæ hac nubium fæcunditate, & in
sterili & in infœcundo agro uberrimè pul-
lularunt & floruerunt. Lues Arriana to-
tius Orientis agrum peruersit: protulit bi-
nam nubem Deus, in Ægypto Antonium
illum magnum, in Cappadocia Basiliū;
horum sodalitum amplissimè se extendit,
fidei & pietatis doctrinam & exempla
pluit, quo omnia fæcundauit. Eadem tabes
sese in Occidentem effudit, VVandalis Afri-
cam, Ostrogotthis Italiam inuidentibus.
Africam cum suis quasi nubes valida rigat
Augustinus, Italiam cum suis Benedictus.
Albigenses omnigenique hæretici agrum

Domini

AD RELIGIOSOS.

Domini in Occidente depopulantur & va-
stant, fœcundat eum cum suis Dominicus,
Franciscus cum suis, feruentes hæreses fidei
doctrinā extingunt; aridi in Christiana
pietate sanctis eorum exemplis reuirescunt.
Omitto quod sancti Dominicus & Fran-
ciscus, nubes arctissimo amore conglutina-
tæ, ingentem & ardenter Dei iram tem-
perarint & deleuerint, ne acrius in homi-
num perniciem sœuiret. O nubes præclaras,
celosas & orbi salutares, quæ mundum ri-
garunt & protexerunt! Utinam talem no-
bis fructum proferant quos Deus nouos
Religiosos, ceu recentes nubes, hoc nouissi-
mo sæculo excitauit. Benè, vt spero, omi-
nabitur Deus, qui in id Religiosos desti-
nasse videtur, vt Euangelicam doctrinam,
& Christianam pietatem mortalium animis
inserant, Dei gloriam illustrent, & homi-
num pectus in huius studium inflamment:
ad quod munus rectius obeundum Religio-
sis dedit cor veræ pietatis amore flagrans,
& mentem egregia doctrina instructam,
& linguam eruditam. Notissimum est,

inter

P R A E F A T I O

inter Occidentales, quatuor ex antiquis Do-
ctorum primas tenere, Ambrosium, Augus-
tinum, Hieronymum, Gregorium: horum
tres posteriores Ordinum religiosorum Pa-
tres. Inter Orientales, similiter princeps lo-
cus datur Basilio, Nazianzeno, Athanasio,
Chrysostomo; è quibus Basilius, Nazian-
zenus, Chrysostomus, monachi fuere. Horum
vestigiis si insistere cupis, Religiose, Pa-
trumq; tuoru moribus respondere; non po-
tes, nisi summo studio & cultissimis mori-
bus (ipsi enim plerique omnes viri doctrina
præcellentes, morum innocentia commenda-
ti, grauitate venerandi, prudentia consilioq;
suspicendi) in id totus incumbas, vt te
Religionum Sanctis componas, sapientiae Dei
cultum addas, simulque in te pietas & sa-
pientia colluceant. Tota tua vita sit nihil
nisi sacra concio: misce sermones eruditos,
plerumque sacros, & ad pietatem facien-
tes: ea promas, quæ locupletius & orna-
tius quam ullæ gemmæ adornent & di-
tent. fiet sic, vt neminem non dimitas me-
liorem & pietatis amantiorum. Grauis &
efficax

A D R E L I G I O S O S .

efficax eiusmodi sermo : sed dictu mirum,
quanto efficacior præstantis quod docet ; ac
virtutis exemplar non dictis tantum , sed
factis ponentis ob oculos. Ideò tibi, Religiose,
cura erit , vt incessus , vt oculi , vt sermo ,
vt mores , vt facta veræ Religionis indicia
præ se ferant. Passim tua exempla referan-
tur, quomodo fortiter spreueris obuiam vo-
luptatem , quomodo lucrum posthabueris
pietati , quomodo tuæ gloriæ prætuleris glo-
riam Christi , quomodo male merentem of-
ficiis obrueris , quomodo mala quæque pa-
tienter pertuleris. Videant omnes tuæ vitæ
integritatem , sanctimoniam , mundi con-
temptum , mores puros & castos : et rectè
nubis munus expleueris , si altitudine fueris
delectatus , quæ Paulum in cælum agebat ;
(Conuersatio , inquit , nostra in cælis est)
deplueris etiam cælitus sapientiam Christianam
veræ pietati coniunctam.

Sunt & Religiosi columbis similes , quæ
euolant ad fenestras suas : summa celeritate
mouentur pullorum amore , qui intra colum-
barij fenestras agunt. Fugiat Religiosus tu-
multus ,

P R A E F A T I O

multus, non amet strepentia fora, sed gau-
deat quiete, & amicam sibi faciat tranqui-
litatem, nisi aut vocationis aut muneris ra-
tio ad publica impellat: quia in solitudine
frueris eo quem toto ardes amore. Elias Dei
contubernium petit: reperit non in curia,
sed in spelunca; non in turbine petras con-
terente, non in commotione, non denique in
igne, sed in auræ tenuis leuis sibilo Deum
sentit adesse. Ioannes angelus Domini vo-
catus, cælestem vitam in eremo exegit, ubi
diuina arcana edocetus est; ut dissimulatum
homine Deum oculis usurpare & dígito
monstrare meruerit. In montibus, in deser-
tis, in litoribus potissimum Christus do-
cuit, & tribus discipulis gloriam cælestem
prælibandam peramanter exhibuit, qui non
nisi secretius in suorum pectora illabitur,
& in ea suos effundit amores; cum non nisi
in thalamo castissimo sponsam sui amore lan-
guidam Sponsus reficit & amplectitur.
quod inter multos sacer Hieronymus testa-
tum facit. Dic, quæso, virorum sanctissime,
quid tu in ista horrenti solitudine, immo-
dica

AD RELIGIOSOS.

dica confectus inedia , vigiliis propè perpetuis maceratus agis ? O quoties , inquit , in eremo constitutus , in vasta illa solitudine , quæ exusta solis ardoribus horridum monachis præstat habitaculum , putavi me Romanis interesse delitiis . Et ut mihi testis est Dominus , post multas lacrymas , post cælo oculos hærentes , nonnumquam mihi videbar interesse agminibus Angelorum , & latus gaudensq; cantabam : Post te in odorem vnguentorum tuorum curremus . Nimia Domini suavitate affectus nihil præter illum desiderabat . Tali nos ardenter amoris focula succensi , ceu columbæ ad pullos , nos ad Deum & Christum eius , animæ nostræ delicias & voluptatem , euolemus ; mente totoque cordis affectu pensitantes : Ecce tu pulcher es dilecte mi , & decorus ; lectulus noster floridus . Sub umbra illius quem desideraueram sedi , & fructus eius dulcis gutturi meo . Defecit caro mea , & cor meum , Deus cordis mei , in te cogitatione fixum . Quis amores , quis volupta-

*** 3 tes,

P R A E F A T I O

tes, quis honores ex hoc pudicissimo stilantes glutino recensemebit? Si columbino ei inhæremus ardore, ipsi arctissimo charitatis vinculo adstricti; in suam nos conuertet dignitatem, gloriam & claritatem: non aliter quam virtute agendi præstantissima ignis natura carbonem, quantumvis atro colore, in suum continuò transfert splendorem. Sic felices illi animi in lumen claritatis transformansur æternæ, sicque diuinæ sunt consortes naturæ.

Verba deficiunt, excidunt sententiae, cùm ad beatissimam illam deuenio vniōnem. Unum te volo, ut ad hanc properes vniōnem, euoles à rebus creatis, aduoles ad rerum omnium Conditorem, aduoles quò vocaris in foramina petræ, in cauernam maceriarum: ibi tutus, ibi beatus eris. Sic, si quid boni habes, augebitur. Ea quæ extuli præclaras facinora paratissimæ obedientiae, opulentæ paupertatis, & niueæ puritatis, setare, amplectere; quia hæc sunt quæ verè consecrant immortalitati. Olim Olympicis victoriis claros in Deos euehi scripsit Horatius.

AD RELIGIOSOS.

tius. Olim solemnni ritu qui cum laude ges-
sissent imperium referebantur in numerum
diuorum. Sed hæc non nisi inanis & ad-
umbrata veræ felicitatis imago : tu sacro-
sanctis , quas tibi prædicavi , virtutibus
solidam eminentis felicitatis possessionem
mercari contendere. Sic enim itur ad astra.



*** 4

CAN.